



01336

丁文誠公奏稿

卷之二十一 目錄

動撥歷欠黔饗歸還援黔的饗摺 光緒七年正月二十七日

雷波夷務肅清摺 光緒七年三月二十七日

機器局購地添製火藥片 同日

勇糧長夫難再減裁摺 光緒七年三月二十七日

查明無著殘積各鹽引請飭部註銷摺 光緒七年三月二十八日

三月二十八日

查明鹽務無引羨截請予豁免摺 光緒七年三月二十八日

恭慰大孝摺 光緒七年四月初四日

請仍頒官運鹽局銅質關防摺 光緒七年四月二十九日

奏稿卷二十一 目錄

補授川督謝恩摺 光緒七年五月二十一日

議抽煙釐大概情形摺 光緒七年七月十一日

勸辦積穀收有成數摺 光緒七年閏七月二十九日

懋功同知等缺改章揀委片 同日

岩番劫殺洋人查拏辦理片 光緒七年八月二十一日

太甯奉節分別添設學額拔額摺 光緒七年十月二日

籌撥鹽釐辦理川北積穀片 光緒七年十一月初五日

西藏官兵鹽糧月費請復舊制片 光緒七年十一月初五日

靖遠夷匪肅清摺 光緒七年十一月三十日



動撥歷欠黔饗歸還援黔的饗摺

光緒七年正月二十七日

奏爲川省動撥歷欠協黔兵饗歸還同治九年以後前貴州提督周達武援黔案內的饗以清款目恭摺仰祈聖鑒事竊查同治九年九月初六日欽奉

上諭曾璧光奏黔省軍務緊迫各摺片崇實等惟以節省饗需爲事殊屬不知緩急著迅速進兵與楚黔各軍聯絡夾擊不得遷延干咎等因欽此當經前任成都將軍

臣崇

實四川督臣吳棠會商具奏請飭貴州提督周達武督飭武字等營赴黔援勦卽以川省原協黔饗改爲每月協黔的饗銀五萬八千兩專供周達武援軍口糧奉

旨允准在案周達武旋於九年十月十五日到黔接防維

奏稿卷二十一

一

時川省分撥各省協饗爲數已多司庫倍形支絀兼顧爲難吳棠等分飭川東富榮各釐局及司庫經收釐捐項下盡力湊撥陸續解赴黔營計自周達武到黔接防之日起至凱撤止計由川撥解釐金一百數十萬兩是時以援黔軍食爲重不能不先其所急而川省應籌京外協饗以及本省臺費向俱賴釐捐以資接濟竟至無款可籌嗣由司查得川省歷年部撥地丁鹽課等項協濟貴州兵饗因值軍務倥偬庫藏匱竭尙有未經撥解銀數十萬兩自應以之撥作援黔的饗儘數歸還前動釐金俾以協黔之饗作爲援黔之用以符名實而司庫應解京外各饗亦得將所還釐金次第勻撥藉免顧此失彼當經前任各藩司在於

欠解常年協黔兵餵項下動撥同治五年部撥地丁銀六萬兩六年部撥地丁銀八萬兩七年部撥地丁銀六萬兩十年部撥地丁銀十萬兩十一年部撥地丁銀十萬兩十二年部撥地丁銀十一萬兩十三年部撥地丁銀十六萬兩光緒元年部撥地丁銀十一萬兩以上共動撥銀七十八萬兩陸續撥還前籌援黔的餵內動支川東富榮各釐局及司庫釐金銀兩並將所還釐金銀七十八萬兩隨時撥解京外協餵及本省臺費等項在案惟係陸續撥還之項當時未便瑣屑入奏至撥還之後值前任藩司交卸漏未詳請彙案奏咨茲據現任藩司程豫清理庫款挨年查明補詳請奏前來臣查同治八九年以前黔省軍務糜爛

奏稿卷二十一

二

先後凡十數載幾於埽蕩無期自唐炯率軍進勦而清水江北岸始能肅清自周達武統師深入而全省遂克底定固由各營將士血戰之勞而前任四川督臣藩司籌措餵精實亦不遺餘力當時庫儲未充東挪西湊悉索供應但期馬騰士飽早竣全功原未暇各分各款迨後因京外各餵無可分撥始將前提援黔的餵在於欠解部撥黔餵內分年撥還而京外各省營協餵藉以分濟無誤均係實在情形現據該司查明歷年在部撥黔餵項下歸還援黔的餵內所用釐金分濟各省協餵彙案具詳到臣隨覆加確查無異除咨部查照外理合恭摺具奏伏乞

皇太后

皇上聖鑒訓示謹  
奏

奏稿卷二十一

三

雷波夷務肅清摺 光緒七年三月二十日

奏爲官軍勦辦雷波夷務疊破堅巢殲除悍匪內外二十支各夷一律投誠就撫邊境肅清恭摺馳陳仰祈

聖鑒事竊 臣等前於奏報我邊蠻匪肅清摺內聲明雷波

夷務迭據總兵李培榮稟報連獲大勝匪勢已形窘迫投

誠甚衆容報肅清再行馳陳在案先是 臣等查得雷波夷

匪以烏拋阿忽庚扎等支爲最强悍庚扎向分三大支內

又各分十餘小支厯恃路險人強出巢滋擾非大加懲創

則犬羊之性桀驁難馴終爲邊境大患因隨時切諭李培

榮相機妥辦去後旋據陸續稟稱自攻拔田家灣一帶後

步步扼險屯營抽派精銳協同添募鄉導土勇四路搜勦

奏稿卷二十一

四

九月二十七二十八九等日官軍節節進攻疊有斬獲夷

酋楊曲賀盧恆學朱黑達曲挪楊曲耕姑基曲哈散達等

均各釋械來營求撫十月初八九等日負主寨夷酋米月

鵠盧那巴胡木干八欠丁洪牛等各在對面山頭喊稱投

誠當令守備張世傑傳諭如能捆獻爲首兇夷繳出槍擄

難民始准歸降詎該夷限期認繳連日毫無動靜李培榮

當傳各將弁面授機宜於十四日進攻負主寨副將張占

鼇總兵周勝德提督邵永齡等督隊行至阿托地方夷匪

悉衆二三千人憑高力拒我軍以槍礮仰攻斃賊數十人

軍功安天壽立斬紅衣悍夷一名總兵劉興旺等率兵勇

由後路抄出賊衆驚潰退踞漂漂石抵拒遊擊汪期紳等

亦帶隊從小路馳至猛戰十數次殲斃悍夷二百餘名逆勢不支始紛紛敗退官軍追過河岸立將山脚蠻房數百間一律焚燬適總兵劉鎮湘等由長河塢後山繞出因見各軍追賊過河揮隊急前夾攻該夷腹背受敵又斃賊三百餘人生擒四十二名外委卿祖訓湯有能軍功徐連升均因中槍陣亡劉鎮湘跟追至負主寨礮口時已天晚卽收隊就寨外紮營十五日汪期紳郝錦富等率隊由中路邵永齡劉鎮湘等由左路楊斌張占鼇李修德等由右路各帶勇丁蟻行進攻汪期紳先登手刃守礮賊數人砍倒木柵左右兩軍一齊綠柵而上奪據要隘斃賊四五百名生擒五十七名逆夷倉皇失措奪路狂奔落澗墜巖不計

奏稿卷二十一

五

其數立將負主寨攻克平燬礮樓八座焚燒蠻柵八百餘間餘匪俱由母狗坡遁入大小谷堆隨有石租吳奇阿著阿陸金區補節阿合熟租板都各支率土目赴營泣求免死李培榮察其情真優加犒賞而庚扎阿黑等支仍恃其人衆地險負隅如故李培榮隨飭張占鼇等分督勇丁在負主寨左右山梁修築土礮成犄角之勢並於箐林中虛豎旗幟設爲疑兵而自率勁勇千名進紮母狗坡並拏獲奸細訊知庚扎搬來涼山悍黨千人爲抵死拒敵之計適二十五六兩日大雪瀰漫該夷以我兵難於出擊羣在對山呼跳李培榮見其有恃不恐密派李修德劉鎮湘潛由山徑帶兵埋伏一面令汪期紳等出營誘敵二十八日黎

明後夷匪數千蠶擁來撲汪期紳等領隊迎擊哨弁賈保勝帶悍勇數十名殺至山腰猝被飛石打傷腦頂陣亡外委丁高全張和保曾占春奮勇衝突生擒庚札敢戰悍夷鵲窩迭忽噉伊三名立即陣斬該夷拚死鏖戰經黃仕明親督洋槍小隊迴環施放擊斃夷匪二十餘人守備黃仕瀛躍入賊隊砍斃夷酋二名突遇兇酋牛滋阿插二人乘閒用矛刺中小腹登時殞命外委丁高全等三員亦中弩矢陣亡黃仕明忿弟之死鼓勇大呼立將牛滋阿插刺殺各夷見悍逆殲除殆盡悉向老林竄逃不虞溪澗深處李修德劉鎮湘等伏兵齊起噴筒火蛋前後拋擊又斃匪二百餘名生擒二十七名該夷奔逃無路擁擠撲河約數百

奏稿卷二十一

六

名我兵追殺二十餘里將大小谷堆立時攻克平燬堅卡二十三處搜殺著名兇夷十數名生擒十二名是役也傷斃夷匪極多而我軍亦傷亡三十餘名庚札等見各夷多已投誠勢成孤立中情惶恐即令夷酋到營呈懇歸順李培榮以該夷夙稱狡詐根株之盤結既固黨類之頑悍復多現雖悔罪乞降恐其心猶未死未經允許其時積雪封山李培榮仍日日激勵將士鼓勇前進不少休息本年正月二十四日有庚札亡弟簡巴喇之寡妻母子同其妯娌孀婦五六人率領黑夷眷屬男女數百邀集已降之楊曲等代具連環保結傾巢詣營伏地哀懇施恩至再至三並願全繳難民軍械以表真心李培榮見其投誠屬真准其

歸順並飭傳木刻往大小涼山互相招集於二月十三日  
各支夷酋率領千餘人均來營飲血歃盟大鑽牛皮李培  
榮宣布

朝廷伐叛服柔德意曉以利害反覆開陳各夷酋指天誓  
日永不敢再萌叛志自干誅戮仍各支認輸派令黑夷在  
雷波廳衙門上班當差隨卽照例賞給鹽酒布疋將歷次  
擒獲未經斬戮之夷娃等悉交領回各感泣歡呼而去夷  
務一律肅清具報前來臣等查雷波夷地緊接涼山遠近  
共二十餘支其間庚札阿黑吳奇石租等支各自爲雄不  
相統率屢經蹂躪邊疆實屬罪魁禍首歷來進兵勦辦官  
軍以該處山深箐密進退俱難無敢深入該夷亦從未歸

奏稿卷二十一

七

化此次與我邊雅扎胄扭等支狼狽爲奸出巢滋擾近逼  
雷城勢極鴟張加以界連滇省之永善縣副官村金沙江  
等處又爲匪徒出沒之區更慮乘機勾結滋蔓難圖自李  
培榮帶兵勦辦又添鄉勇引導前驅並約會滇軍嚴密防  
範阻其勾結竄逸之路籌維布置備極周詳於是節節進  
勦歷險入深將田家灣長河壩羊子橋負主寨等處該夷  
自恃爲堅巢者悉予焚燬而大小谷堆尤爲該夷地第一  
要隘歷來官兵所不及到今一戰奪其所恃則扼其死命  
該夷自知無能爲力自不得不悔罪輸誠計前後殲除悍  
匪約一千餘名生擒一百八十餘名奪獲牛馬豬羊數百  
頭弩箭刀矛一千餘件救出繳出難民男婦數百餘名從

前侵占地土均行收復內外二十五支蠻衆數十萬人及時歸誠雷波全境肅清查投誠之簡巴躺孀婦母子最有膽識伊支人衆均聽指揮李培榮以該夷婦此次深明大義又能約束夷衆事無大小呼應極靈特優給賞需用示羈縻而資箝制復經妥擬善後事宜以該夷支數過繁議添設土千戶二名百戶九名夷兵二十七名酌定章程嚴保甲肅營伍修碉堡平斗秤禁漢奸以及按期關發夷餼責令黑夷上班等條均屬謀深慮遠洞合機宜臣等已飭該廳文武遵奉刊碑永遠照行並委員前往勘明應添碉卡要隘籌款興修期於一勞永逸一面飭李培榮將所募鄉導土勇妥爲遣散歸農用副

奏稿卷二十一

八

聖主綏邊節饒至意至此次在事將領員弁枕戈卧雪出入於深林峻坂之中功深戰苦備極艱辛與用兵內地不同不無微勞足錄謹擇其冒死出力者籲懇

天恩先行鼓勵其餘尤爲出力員弁可否容臣等查明彙案請獎出自

逾格鴻慈陣亡總兵向集梧等並懇

勅部分別從優議卹以慰忠魂此外陣亡士卒由臣等再行查明分別奏咨請卹其受傷各勇現均查明給賞醫調以作士氣而勵戎行所有勦辦雷波夷務疊破堅巢殲除悍匪內外二十五支夷衆一律投誠就撫邊境肅清緣由謹合詞由驛五百里馳奏伏乞

皇太后

皇上聖鑒訓示謹

奏

奏稿卷二十一

九

機器局購地添製火藥片

光緒七年三月二十日

再臣於去年五月將遵

旨復開機器局製造洋槍等件擇日開辦緣由專摺奏明在案現查開局以來仿照西法督工造辦槍礮均有成效可觀惟洋槍須用洋火藥方能發機迅速命中致遠歷年臣派員前赴山東上海購運來川分撥各營應用所費實屬不貲亟應仍添設機器製造俾資節省而備要需第機器局向設城內人煙稠密只能鑄造洋槍若製造洋火藥則慮別有疏虞自須覓僻靜寬敞之區另建藥局以資分造當飭總理局務成縣道崇綱補用道黃錫燾督同局員等踏勘地基去後旋據勘得省垣南門外離城較遠之

奏稿卷二十一

十一

古家壩地方四圍空闊寬廣約六七里絕少民居且濱鄰江干以之安設水機修造藥局甚爲相宜並有趙姓民田一處自願出售隨令委員等攜帶官弓眼同丈量計田六畝七分一釐七毫四絲議照時價每畝銀五十兩共銀三百三十五兩八錢七分書契交局價銀如數面給田主趙天佑等親手領訖委無抑勒短少等情臣卽飭局員於上年十一月初十日動工修造局房一面派員前往敘永懋功等屬採買硝磺隨時仿造洋火藥所有監造事宜仍歸總局經理所需田畝契價暨修局木石軛瓦等項與泥水匠作工食銀兩仍在機器局奏明之土貨釐金項下開支事竣一併開單核實報銷臣惟當督飭局員樽節興修不

准稍涉虛糜以期工歸實用除咨部外謹附片具陳伏乞  
聖鑒訓示謹

奏

奏稿卷二十一

十一

勇糧長夫難再減裁摺 光緒七年三月二十七日

奏爲川省勇糧勢難再減各營長夫亦難按照直隸練軍章程隨時雇募據實陳明恭摺仰祈

聖鑒事案查前准戶部咨川省裁減口糧改換營名核計東勇每名日支銀一錢一分與前任山東巡撫閻敬銘奏定東勇口糧每名月支銀三兩數目不符行令將川省各勇口糧遵照東勇章程每名月支銀三兩造報以節糜費又准兵部咨以川省各營定章必須雇用長夫以供拔營運送軍裝之用核與直隸練軍遇拔營之時始行添雇長夫章程不符行令改照直隸章程遇拔營之時始准雇用以防冒濫仍將改支日期先行報部各等因當卽轉行籌

奏稿卷二十一

十一

饒局司道遵照核辦去後茲據該司道等會詳遵查川省支發勇糧向祇有楚黔川三項章程原無東勇名目目前因楚勇口糧每名日支銀一錢五分黔勇日支銀一錢三分每勇百名設正副百長二名口糧倍給設長夫五十名每名日支夫價銀八分似覺稍優本擬照東勇章程量爲刪減旋查川省錢貴銀賤物價加昂不能不因地制宜使各勇足敷日食兼之北省運送軍裝均用車輛以代人力川省跬步皆山旣無車輛挽運不能不另給長夫勢所必然且採買軍食離營或數十里或百餘里亦藉長夫背負是以未敢議減惟仿照東勇章程樽節定議將勇糧核實支銷每勇一名日支口糧銀一錢一分每勇百名設正副百

長二名口糧倍之外設長夫五十名每名日支夫價銀八分總計每營每月較楚勇章程節省銀六百十二兩較黔勇章程節省銀三百零六兩已於光緒四年六月初五日奏明在案嗣准戶兵二部來咨以勇糧應照東省定章每月支銀三兩長夫應照直隸練軍章程遇拔營之時始准雇用等因覆查前次酌減勇糧原爲力求撙節起見當此庫藏竭蹶之時如果勇糧長夫稍可再減不致債事自應恪遵辦理無如川省銀價日低食物日昂各營駐紮之所多係邊瘠之區其價又昂於腹地卽照前議章程支給各營勇丁無以贍家已覺拮据若於議減之後復又減支誠恐該勇丁等食用不足難期得力於邊防大有關繫且查

奏稿卷二十一

三

東省勇制有東勇治勇之別亦不盡支三兩每營有馬勇差勇有正副營官哨官支款在在浩繁川省現議章程並無此項開銷若以每營銀數匯總計之仍屬彼此大略相同萬難再省至川省各營雇募長夫誠以川省地方遼闊東西南三面均界夷地接壤滇黔邊隘繁多伏莽時發營勇難於分布均應隨時抽調巡防並非經年累月駐守一處卽如上年各營勇丁調赴松潘龍安戡邊雷波等處防勦並無一日餘閒又均係於奉調之日隨調隨往並未片刻耽延是其明證如必遇移營始准雇募短夫設遇有急務奉文調遣各該營原駐之地多荒涼無人應募而一時人夫雇募不及不能立時就道必致貽誤防務溯自軍

興十餘年來川省各勇營均係常年雇用長夫實由於調遣不時况各省物價不齊地勢險夷尤異若必勉強遷就減而又減一遇征調營勇有所藉口深慮軍心不一難期得力再四熟商與其貽誤於臨時曷若籌畫於事先懇請仍照前定章程每勇一名日支銀一錢一分每勇百名不分征防照舊設長夫五十名每名日支銀八分俾得足敷日食征調便捷等情請奏前來臣查川省界連滇黔秦隴湘鄂六省兼鄰衛藏幅員太廣沿邊數千里苗夷環伺時虞蠢動內地人心浮囂成習滇黔各邊伏莽亦屬堪虞原設防營本屬分布難周卽如上年階州生番滋事松潘龍安一帶紛紛告急又值峩邊雷波夷匪同時出巢均係抽

奏稿卷二十一

十四

撥他處防勇星夜馳往迅速勦辦朝夕行毫無瞻顧遷延確著成效各營勇糧在光緒三年未經裁減以前實屬優裕至裁減以後銀價愈賤每勇每日所領之饟僅換獲錢一百三四十文而川省米糧較之他省爲貴除食用外毫無餘贖實難再減分釐至長夫一項因川省岡嶺重疊跬步皆山所有軍裝一切不能用車輛推送舉凡油薪米糧粗重之物無不藉人力以資挽運旣與直隸等省平原廣漠便於馳騁之處迥不相同且直隸防營堪以調遣者尙多並不專用練軍亦與川軍朝東暮西時時互調並一切地勢險峻隨地皆登山陟嶺者情形互異在部臣意從核實摺節援案核議不遑他計臣自東來川將及四載周

覽通省形勢深嗟蜀道之難異於他省而四面夷疆環繞時有征調之事欲期軍行迅速無慮遲滯非雇用長夫不能爲力相應仰懇

天恩俯念川省勇糧較前刪減已多各軍効命疆場日用飲食不能令其短缺似應略加體恤准照臣奏定章程每勇一名日支銀一錢一分每百名仍舊雇用長夫五十名每名日支銀八分俾得士飽馬騰庶有事之時星馳電掣可免貽誤事機不勝屏營待

命之至再臣於庫款極知慎重前見川軍口糧稍優則不待部議已先自切實大加核減通計全年所省不少至旣減之後目擊礙難再減實情亦不敢惜小利而昧大計惟

有據實直陳於

奏稿卷二十一

五

君父之前所有川省勇糧已減實難再減及查看地勢未能裁撤長夫緣由謹恭摺具奏伏乞

皇太后

皇上聖鑒訓示謹

奏

查明無著殘積各鹽引請 飭部註銷摺 光緒七年  
三月二十八日

奏為查明川省歷追無著殘積各引懇

恩飭部註銷以免虛懸恭摺仰祈

聖鑒事竊臣上年督飭司道在於省城設局清查通省殘

積各引當經奏定章程六條嗣後各計岸額引於奏銷報

完後扣限半年追繳殘引永遠不准展限從前改配推代

之引未經繳殘者責成地方官追繳均以八箇月為限逾

限不繳無論已行未行一概作為廢紙嚴飭各廠關卡隨

時扣留申繳由部臣議准覆奏奉

旨依議欽此欽遵嚴飭照辦臣復先後出示剴切曉諭各

奏稿卷二十一

屬商人如有收存光緒四年以前積滯鹽引已行繳殘未

行繳引依限赴各州縣呈明造冊通報准將所繳未行各

引發局以次帶銷收回稅羨由局查明凡有從前由商墊

完課稅羨截尙未行銷之引仍准商人赴局請領歸還墊

款一面行知各州縣廠局關卡認真盤驗如有前項逾限

積引隨時扣留申繳並迭次催傳商人勒限全繳迄今原

限早滿據各州縣將遺失引張分年造冊詳送鹽道逐細

句稽查明光緒六年辦理四年奏銷案內聲明未繳部引

一百十萬五千九百三十三道餘引四千三百四十道又

加五年分全額十六萬八千四百七道總共一百二十七

萬八千六百八十道內除黔滇鹽務總局丁戊兩綱已繳

行過殘引外實存總局未行水陸引五十一萬一千九百九道官引局已行水引五千四百六十八道陸引三萬四千七百二道道庫存留積引殘引水陸共三十萬一千七百七十七道外綜計成都等八十二廳州縣自道光年間起至光緒四年止實共未繳無著水陸引三十一萬八千八十三道或因商人配鹽失事落河漂沒當時漏未呈報者或因軍務時配鹽在途被賊焚劫無存者或因推行楚省歷年過久商引皆無著落者或因輾轉改配不知商人存亡及押引抵債爲債主遺失者實在無從著追經該道崧蕃唐炯會同逐細查明按年分縣造具清冊懇請奏咨註銷仍嚴飭各關卡認真盤驗如有前項引張隨時扣留

奏稿卷二十一

七

以杜重照等情前來臣查此項遺失引紙從前應由地方官及鹽道加具印結始能咨部註銷但現查遠年商人均已逃亡故絕無從傳訊閒有近年商人大都素乏資本早將此引押人抵債而各債主輾轉推出迭易數主究竟何年在何處遺失盤詰本商均無從知悉雖地方官嚴刑追問而該商等始終茫然惟有俯首認咎無從訊取確供卽無從平空取結若久押待質徒開差役詐索之端仍於公事無補况引紙既多歷年又久未便再任遷延拖累現惟嚴飭各關卡認真盤驗如有商人夾帶此項遺失之引影射私配卽將原引商人一併扣留從嚴究辦追出廢引隨後送部燬銷儻關卡員役查有賄縱含混情事一併從嚴

參辦似此力杜弊端自無慮重照私配除將清冊咨部立  
案查銷外所有歷年遺失無著鹽引造冊咨部註銷緣由  
理合恭摺具奏伏乞

皇太后

皇上聖鑒訓示謹

奏

奏稿卷二十一

六

查明鹽務無引羨截請

予豁免摺

光緒七年三月二十八日

奏爲查明川省鹽務積欠羨截銀兩帶征已確有成數其  
屢追無引之羨截懇

恩准予豁免以清界限恭摺仰祈

聖鑒事竊

臣

上年奏定鹽務章程清釐積引聲明勒令各

州縣將已銷未銷在官在商逐年分造清冊連引送局查  
辦官運總局先行完新引以次帶銷積引官引局專銷滄  
引並帶銷計積各引頻年一律照辦並示諭各商勒限六  
月八月已行繳殘未行繳引逾限不繳作爲廢紙咨部註  
銷經部臣議准在案茲據各州縣遵式造冊連追繳殘積  
各引一併申送由鹽道詳細旬稽自道光三十年起至光

奏稿卷二十一

九

緒五年止共積欠羨截銀一百七十七萬一千八百七十  
九兩零內官運局丁戊巳三綱帶銷積引二萬四千六百  
四十一道官引局專銷滄引並帶銷計積各引三萬二千  
四百一十道零三年之中兩局共收回從前積欠銀四十  
八萬六千五百二十七兩零已撥出銀二十二萬餘兩填  
補從前積欠入冊具報又據各商繳存官運局未行水引  
七萬七千二百八十道零又存鹽茶道庫未行水引一萬  
五千一百一十道零此項未行之引將來官局陸續帶銷  
共可收回銀七十三萬一百四十八兩零約計五六年中  
卽可銷竣全完是通省積欠之一百七十七萬一千餘兩  
除已完之四十八萬六千五百餘兩又追存引張實可收

回之七十三萬一百餘兩共計已征未征有著羨截銀一百二十一萬六千六百七十五兩零此係將以前無用廢紙變爲實銀從此官運不廢必能確有把握至此外尚有積欠羨截銀五十五萬五千二百三兩零實因從前鹽務紊亂無章無人整飭又值川滇黔三省軍興口岸廢弛廠困商亡迨後改章濟楚官商又復以改代改配舞弊營私歷數十年迭經嚴追實已無著由道查議與其空負追欠之名永無收回之日徒以虛懸之款項爲各書役訛詐需索之端不若據實具詳奏請豁免俾得劃清界限永杜轉轄所有歷年商已亡故無引羨截銀五十五萬五千二百三兩零據崧蕃唐炯會詳奏請寬免前來

臣查鹽從引銷

奏稿卷二十一

三

銀從引出能銷一引之鹽方能完一引之銀川省自咸豐年間軍興以後滇黔邊岸久困兵燹內地亦迭遭蹂躪商人慘罹鋒鏑嗣創議濟楚又復改代改配套搭攙混上下恣意營私以致前後積欠羨截一百七十餘萬兩

臣自光

緒三年冬閒開辦官運以來督飭道府州縣頻年多方設法勒限追繳並出示曉諭通省州縣凡商人已領之引如已墊完課羨尙未配行者准其將引呈繳官運等局帶銷發還商墊稅羨銀兩商人知繳引之後不但無害而且有利是以依限踴躍完繳不肯握匿三載以來由局代銷收回羨截銀四十八萬兩有奇又繳存道局未行之引計尙可收回羨截銀七十三萬餘兩計原欠羨截銀一百七十

餘萬兩內除已經收回並現在有著者已逾三分之二此外積欠之五十餘萬兩實係年遠人亡引早遺失無從著追且其中有十六萬兩有奇係道光三十年以前潼商虧欠無著之款推交邊商代完查明實係因人受累軍興後家破人亡更無人代繳確係實在情形臣自抵川後痛疾此省鹽法弊壞太久力圖整頓凡於鹽務應追之款無不大聲疾呼雷厲風行不容絲毫掩飾遺漏各該廳州縣均慮干嚴議亦竭力追繳乃時閱三載竭盡心力舌敝唇焦止能得此收回有著之一百二十餘萬兩較之從前一百七十餘萬兩全行無著已屬便宜至其餘欠款查係無引無人實無從追還不特微臣無法可施以後雖有才力百倍於臣者遇此亦必束手終歸無著再四思維惟有據實奏懇

奏稿卷二十一

三

天恩俯念該商等往年格外捐釐報効歲近百萬其積欠此項無引羨截五十五萬五千餘兩多係因人連累實在無從著追勅部一律豁免以清界限而杜轆轤至此寬免後通省無無著之引張卽無虛懸之羨截自光緒七年爲始責成各廳州縣及局卡委員恪遵先課後引定章每領一引卽先完一引之銀無論正銷帶銷正款雜款不准帶欠分毫似此一免一徵截然不紊則涓滴皆歸實在官商不能再有朦混趨避無難年清年款從此川省鹽務一律廓清洗

盡從前掩飾牽抵之弊實於整飭鹽綱之法大有裨益所  
有川省歷年積欠羨截帶徵已有成數應請將實在無引  
羨截懇

恩豁免以清界限緣由理合恭摺具奏伏乞

皇太后

皇上聖鑒訓示謹

奏

奏稿卷二十一

三

恭慰 大孝摺 光緒七年四月初四日

奏爲瀝陳下悃籲懇

節哀仰祈

聖鑒事竊臣於四月初二日忽接禮部遞到藍印公文驚

駭莫名戰慄啟視欽奉

諭旨三月初十日戌刻

慈安端裕康慶昭和莊敬皇太后仙馭升遐伏地呼號神

魂俱失當卽會同成都將軍宗室臣恆訓等率在省僚屬

敬詣公廡齊集成服朝夕哭臨伏維

大行慈安端裕康慶昭和莊敬皇太后

德媿坤厚

奏稿卷二十一

道協乾剛二十年來與

慈禧端佑康頤昭豫莊誠皇太后

奠安區宇

親裁萬幾

宵旰憂勤中外欽服我

皇上孝思維則

定省承歡久申

奉養之隆備極

尊崇之盛方祝

遐齡永享同

覆載以無疆詎期

大故猝乘棄臣民而奄逝

聖心哀痛本於至誠非臣下所得名言惟念我

皇上繼

鴻緒垂貽之重承

鳳闈眷顧之深

付託至鉅

紹述方長伏祈保衛

聖躬勉節哀戚庶克上慰

大行慈安端裕康慶昭和莊敬皇太后在天之靈亦卽以  
仰釋

慈禧端佑康頤昭豫莊誠皇太后願復之意率土臣民同

奏稿卷二十一

三

深泣禱臣

職任邊圻尤不勝瞻

天呼籲懇款屏營之至謹恭摺具奏伏乞

皇太后

皇上聖鑒謹

奏

請仍頒官運鹽局銅質關防摺光緒七年四月二十九日

奏爲川省官運局事關數省擬仍照前議請

旨飭部鑄造銅質關防發局開用以昭慎重恭摺仰祈

聖鑒事竊臣前因川省邊岸鹽局款鉅事繁關涉數省責

任綦重奏請由部頒發銅質關防俾昭信守嗣准部咨查

無辦過成案未便率准等因茲查瀘州設立官運鹽局已

逾三載始則創辦黔省全岸嗣復添辦滇岸並將界連滇

黔之各廳州縣計岸及湖北例食川鹽計岸共四十餘廳

州縣一併歸入官運統計黔滇川楚四省地界均飭該總

局委員設立分卡頒移文告招募商人配發引張分收稅

羨嚴禁販私明定界限時有稟移鄰省督撫司道府縣互

奏稿卷二十一

五

商之件案牘之繁較鹽道加至倍蓰而催提各分局稅羨  
勇糧公費及批解數省協饒每年共百數十萬兩途長道  
險關繫更形重大若僅用木質關防文書通行數省地面  
當鹽務荒廢年久之後事多創行沿途郵驛及隔省官民  
不免疑信參半慮有貽誤而總局距省太遠若每辦一事  
必俟移商鹽道蓋用印信則往返周折動形遲滯勢實難  
行數年來詳細體察該局事繁款鉅規畫久遠現在奏銷  
已辦三綱共收稅釐等項三百數十萬兩實爲西南數省  
另開大宗饒源以後但能恪守定章卽成

國家久遠之利迥非尋常公局止辦一省一時之事可比  
不能不格外慎重况木質關防摹刻甚易行之日久難保

無以偽亂真之弊似未便泥於成案致廢遠圖再四思維  
惟有仍照前議請

旨勅下部臣鑄造銅質滿漢篆文四川辦理滇黔邊計鹽

務局關防一顆頒發該局鈐用俾得永昭信守臣爲慎重

帑項起見理合恭摺具陳伏乞

皇太后

皇上聖鑒訓示謹

奏

奏稿卷二十一

三

補授川督謝 恩摺 光緒七年五月二十一日

奏為叩謝

天恩恭摺仰祈

聖鑒事竊臣接准吏部咨光緒七年四月十八日奉

上諭丁寶楨著補授四川總督欽此臣跪讀之下感悚莫

名當即恭設香案望

闕叩頭謝

恩伏念臣才質駑鈍知識庸愚前以辦理地方事宜措置

不能悉協負戾滋甚迺迭蒙

聖主棄瑕錄用

曲加寬典頂戴

奏稿卷二十一

三

生成涓埃莫報五中循省悚惕彌深茲復渥荷

殊恩補授川督自維

隆施之逾格實非捐糜所能酬聞

命自

天抱慙無地臣惟有益勵官方殫竭愚悃凡遇應辦事宜

敬遵歷次

明訓盡心經理稍冀仰答

高厚鴻慈於萬一所有微臣感悚下忱謹恭摺叩謝

天恩伏乞

皇太后

皇上聖鑒謹

奏

奏稿卷二十一

天

議抽煙釐大概情形摺 光緒七年七月十一日

奏爲遵

旨籌議川省抽收土煙釐金先將大概應辦情形恭摺覆  
陳仰祈

聖鑒事竊查光緒七年五月二十一日承准軍機大臣字  
寄光緒七年五月初九日奉

上諭左宗棠奏禁食鴉片請先增洋藥土煙稅捐以收實  
效一摺鴉片流毒中國爲害甚深近因民間吸食愈多銷  
路愈廣於國計民生大有妨礙朝廷軫念時艱何難申明  
禁令齊之以刑惟慮陷溺旣久輿販吸食之徒日衆空文  
禁制旣屬徒法難行而訟獄滋繁又將別增擾累左宗棠

奏稿卷二十一

无

所奏擬加徵稅釐參用罰懲冀可漸挽頽風不爲無見各  
省原定洋藥釐捐本較洋稅爲重乃總計所收釐金竟遠  
不及進口之稅是承辦各員奉行不力減成折收任令奸  
商隱匿偷漏巡役包庇分肥所致情弊顯然現照左宗棠  
所擬每洋藥百觔統稅釐合計共徵銀一百五十兩內地  
土煙價值較低稅釐准照洋藥推算徵收亦尙平允此項  
係取之於吸食鴉片之人與華洋各商並無干涉著南北  
洋大臣各省督撫將各關口及各地地方情形詳細體察將  
稽查徵收章程悉心妥議於一月內覆奏候旨定奪此事  
務在必行該大臣等當熟籌辦法期於大局有裨實爲至  
要原摺均著鈔給閱看將此五百里諭令南北洋大臣各

直省督撫知之欽此遵

旨寄信前來當卽恭錄分行司道督同籌議伏查洋藥流入中國已數十年吸食之人無不形消骨立志氣昏惰而內地之種罌粟者遂視稼穡爲末務以致民財日耗蓋藏日少而民生日蹙爲害之烈無過於此道光年間嚴申禁令峻法懲辦卒未能絕其根株今議加增稅釐以收禁煙實效是誠釜底抽薪之法第查川省種植罌粟較之雲貴山陝等省情形稍異蓋其地素沃土產蕃多不若雲貴等省專恃土藥以資生計故栽種猶未甚廣且距海口寥遠從無專販洋藥商人入境其本地之販賣土藥亦尙不爲多惟鄰省土煙甚廣價值亦輕斯吸煙者衆溯查川省咸

奏稿卷二十一

三

豐九年奉文抽收洋藥稅釐按每百觔水路抽銀三十兩陸路抽銀二十兩卽經分飭各關並委員前往重慶廣元瀘州萬縣雅安綏定敘永嘉定等處設局抽收所得無幾夔關而外其餘各局核計每月收數尙不敷員役人等一月薪工之用嗣經戶部奏提鉅款更兼指撥臺費無可籌措遂於咸豐十年冬間更章改辦除夔關藥稅仍責夔州府徵解外餘局概行停撤通飭各廳州縣體察情形酌定數目責令收解仍屬寥寥於是自有州縣捐賠者有議按糧攤解者蓋因川省僻處西陲不通海口向無巨商大賈販運洋藥入境川省吸煙之人慣用雲貴及本地所產土煙亦不以洋藥之有無爲重檢查夔關歷年冊報所收均

屬土煙並無洋藥而徵收稅銀則按洋藥章程每百觔徵銀三十兩此外各處分收亦僅止土煙一項絕非有所趨避以洋藥報爲土煙確有明徵迨同治十一年因御史吳鎮之奏停止糧攤各釐局委員誤會其意輒將應抽之藥釐一概停免光緒三年<sub>臣</sub>由東抵川查悉前情以爲洋藥土煙同係害民之物禁令既有不行正宜重抽稅釐以遏其弊况煙土乃百貨之一釐捐何可停免仍飭各釐局隨同百貨一體照前抽收復嚴札各廳州縣禁種罌粟以塞其源數年以來認真督辦平疇曠野之間栽種罌粟者已覺漸少訪查肆市貨賣多係雲貴土煙爲數亦屬有限竊惟鴉片一物蠹民敗俗流毒無窮雖重徵厚斂並不爲苛

奏稿卷二十一

三

左宗棠原奏每洋藥百觔合徵稅釐銀一百五十兩土煙價值較低准照洋藥推算議加查洋藥進口每箱百觔賣銀五百兩議徵稅銀一百五十兩計每觔徵銀一兩五錢係按賣價見十抽三今川省市賣土煙每百觔約值價銀一百六十兩計每觔價銀一兩六錢照洋藥見十抽三章程每觔應徵稅釐銀四錢八分夔關向徵三十兩尙應加徵銀十八兩共徵銀四十八兩儻有洋藥入川應仍照每百觔徵稅釐銀一百五十兩用符原奏而歸畫一至稽查徵收之法大要總不外設卡設巡遴選公正委員會同各地方官勤加稽查而又明定偷漏繞越示罰之條並嚴懲丁役人等暗中賣放訛索等弊舍此別無長策第土煙之

弊全在偷漏繞越而查禁此弊實難蓋土煙爲物較輕而  
值價較重攜帶極便不比他項笨重之物難於掩藏故一  
人之身卽可夾帶二三十觔之土此二三十觔之土姑以  
每觔一兩六錢計之一人卽可得價五六十兩加以偷漏  
釐金卽可得銀百餘兩所獲甚多人情見利必趨見害必  
避查之愈密則避之愈工一定之理而川省販賣土煙之  
人絕少巨商多係小本營生之徒以土煙較他物本小利  
大每不憚禁令甘於嘗試希冀厚獲當其出境販煙之時  
率皆結伴夥行多則數百人爲一起少則數十人爲一起  
謂之煙幫查禁之法若不從嚴則不能抽收若從嚴則土  
販倚煙爲命一卡之巡丁幾何必多恃衆抗拒不服抽查

奏稿卷二十一

三

甚至闖關毀卡無所不爲此皆事勢所必致况川省稽查  
尤有甚難者蓋稽查必須設卡設卡必須有扼要之路庶  
一卡可以堵截數路斯易爲力川省江河一路支流極多  
此外則叢山雜嶺路徑紛歧處處均有小道可通而土販  
繞避釐金恆不畏艱險又多私雇本地土著給以厚資令  
其於人迹罕到之區暗爲引導此處設卡則往彼處潛行  
此路設巡則往他處偷越究之設卡愈多則設巡愈衆而  
每卡日需費用已屬不貲儻吝此不給則巡役枵腹從公  
雖鞭之亦不聽命設卡與無卡同且卡局多設在不肖之  
委員州縣糜費固不必論卽真能實心任事之員耳目亦  
恐難周兼以所用巡役人等不能盡屬正人勢必潛行賄

放卽查之亦不勝查凡此情事若不預爲計慮設將來利  
少害多徒歸咎於委員辦理之不善亦屬無益臣上年通  
飭各州縣規復以前停免之土煙釐金亦暗寓重本抑末  
之意因川省道路紛歧土販趨避太熟至今尙未辦有頭  
緒今議以海口內地各關局一體加重稅釐使吸煙之民  
不能出重價以購土藥寓禁令於無形之中風氣或可默  
爲轉移亟應遵

旨實力奉行現仍應委員再行確查水陸兩路何處尙可  
繞越何處必須添卡何處應設巡役幾名必將通省地勢  
詳細查明始能逐漸辦理至煙販結幫而行已成錮習一  
旦嚴爲查禁加重稅釐打局劫卡之事實在意中尤應預  
爲防範非倉卒所能定局除俟委員查覆督飭妥議嚴密  
稽查章程分飭各州縣關卡委員認真照辦外所有臣督  
同籌議川省抽收洋藥土煙釐金大概辦理情形謹恭摺  
由驛四百里覆奏伏乞

皇太后

皇上聖鑒訓示謹

奏

勸辦積穀收有成數摺

光緒七年閏七月二十九日

奏爲川省勸辦積穀以備荒歉計已收有成數恭摺仰祈  
聖鑒事竊查川省幅員遼闊生齒浩繁各屬山多田少戶  
鮮蓋藏游民日衆人心浮動異常匪類常多伏匿以現在  
情勢而論卽在中稔之歲尙難望其比戶安居若遇偏災  
飢民無以謀生動輒聚衆成羣佑向殷富坐食謂之吃大  
戶此風已成錮習斷不能不先事綢繆况上年山陝大祲  
百姓流離死亡過半雖費千百萬

國帑尙難設法挽救幸該省民情樸厚未至驟生他變設  
使川民偶罹此荒其局勢萬不堪設想臣從前在湖南長  
沙府及山東巡撫各任內均經籌辦積穀頗有成效上年

奏稿卷二十一

書

茲川後卽聞山陝報災倍深顧慮卽擬照前舉辦積穀以  
作備荒之計嗣因接續辦理晉賑陝賑豫賑未能兼顧兼  
恐勸辦官紳一時不得其人轉致擾累地方是以前二三  
年雖連慶豐收仍未敢遽行舉辦去今兩年仰蒙

聖主如天之福年穀尙屬順成糧價較減若再因循延誤  
不思圖匱於豐恐天時不可久恃勢必後悔無及爰斟酌  
時地人情悉心妥議章程刊刻告示徧行曉諭除瘠苦州  
縣無庸議辦外其餘豐收之處一律通飭勸辦惟川省舊  
辦常監社濟各項倉穀綜計不下數百萬石臣於到川之  
次年卽委員前赴各屬認真盤查惟常監各穀尙不致大  
形虧短其餘民間社濟各穀自咸豐初年以來有因奉文

變價解銀以充軍需者有被滇粵各匪焚掠全數無存者  
有因經管各社首暗中侵漁早已貧故難追者兼有並不  
盡心經理以致霉變蟲蝕不堪應用者遂令從前義舉大  
半歸於烏有殊深惋惜此次勸辦積穀小民鑒於前車恆  
多以此藉口臣迭發告示章程苦口勸諭又令其從少捐  
輸俾其力能有餘不致畏難故定章糧戶每收穀百石積  
穀一石以次遞推百分捐一不許顆粒苛派抑勒此時民  
自積之他年民自食之雖湊儲公倉不啻藏諸私室官吏  
只司稽查不得挪用分毫於是大小糧戶咸知此舉爲該  
民保衛身家始各欣然樂從現查一州一縣至多者或捐  
至萬數千石及數千石至少者亦可數百石均係紳民自

奏稿卷二十一

三

願隨力捐納毫無勉強現據各廳州縣陸續稟報業經辦  
理者共有一百一十餘處計共已收倉斗穀五十五萬三  
千二百石有奇臣委員前往確切查驗會同各地方官  
取具各經管紳首實收切結存案其未收之穀約有四萬  
數千餘石飭催各牧令於秋收後次第趕收限九月內一  
律上倉但存儲貴乎經久立法稍不盡善必致復蹈從前  
社濟各穀故轍恐致有名無實應俟穀石全數收齊再妥  
議經管倉儲定章刊示通飭各屬永遠遵守以爲荒年救  
急之助免至臨時束手指望他省挽輸徒致緩不濟急至  
捐穀最多較多之戶無論搢紳士庶有捐數至二三四百

石足敷議敘者應請由臣查明彙案籲懇

恩施獎勵以示激勸而資鼓舞此後仿照章程查看情形  
再積一年俾豐年多一分儲蓄凶年卽得一分賑撫庶於  
國計民生均有裨益所有川省預辦積穀計有成數以備  
荒歉大概情形是否有當理合恭摺具奏伏乞

皇太后

皇上聖鑒訓示謹

奏

懋功同知等缺改章揀委片

光緒七年閏七月二十九日

再川省新疆懋功同知一缺及所屬懋功章谷撫邊綏靖  
崇化五屯屯務暨分駐藏衛之裏塘巴塘拉里察木多西  
藏後藏六臺糧務例應揀派現任人員或試用人員管理  
各以任事之日起扣滿三年撤回內地如果經理無誤分  
別題咨報部現任人員以應升之缺註冊卽升試用人員  
歸入候補班內儘先補用自同治以來因實任州縣均有  
地方要務未便紛紛更調而候補之員人數日多往往通  
融委派屯務糧務事非一年茲查候補大小各員中固有  
自愛之人而見利忘義者實屬不少近來管屯管糧各員  
聞有長支借領因而挪用公項之事現經委員嚴行查追

奏稿卷二十一

七

以憑據實參辦若不另議章程亟籌整頓其弊伊於胡底  
督同兩司悉心籌議懋功同知所屬懋功章谷撫邊綏  
靖崇化五屯經管各屯倉糧及漢夷詞訟未便仍委佐雜  
管理擬請於實缺州縣中酌量揀派至裏塘巴塘拉里察  
木多西藏後藏六臺糧員專管藏衛各處兵饗有領發饌  
需要件並由藏進京往返差務責任亦重擬請於實任同  
通州縣中一體揀委在各該州縣均係實任調委當能自  
顧考成辦理或不致貽誤至懋功同知總管五屯地方體  
制較崇擬請照知府直隸州之例專以實任知府同知直  
隸州三項揀委管理以便統轄所委之州縣惟屯臺各地  
多在遠邊蠻方煙瘴甚重派往之員每多不服水土常生

疾病定例三年期滿爲期似覺稍久非所以示體恤擬請酌減一年以任事之日起扣滿兩年撤回內地本任如果經理無誤照例題報以應升之缺註冊卽升儻有虧短錢糧撫輯乖方等事卽行從嚴參辦如此變通辦理似於屯臺邊地均有裨益據藩司程豫署臬司崇綱署成縣龍茂道錦瑞會詳前來除咨部外是否有當理合附片陳明伏乞

聖鑒訓示謹

奏

岩番劫殺洋人查拏辦理片

光緒七年八月二十一日

再據調管巴塘糧務候補知縣嵇志文稟稱該員本年六月奉文赴打箭鑪廳會算交代於七月二十八日折回閨七月十六日行至距巴三站之奔父木地方接該臺專差飛報巴塘教堂司鐸梅玉林被三岩野番劫殺情事該員星夜趕回詢據同住教堂司鐸畢天祥面稱本月十五日梅玉林押運西國帶來鹽井等處教堂應用物件箱隻十三馱前往鹽井交收分送因係自騾自馬並有乍了番商人夫馬匹同行恃無妨礙未經赴臺署知會照料詎意乍番商人落後梅玉林獨行上前隨身僅帶數人插帳核桃圍蠻塘側近被野番劫殺又詢據同行教民向興順供稱

奏稿卷二十一

三

是日隨梅玉林行抵距大石包二十里之核桃園因乍番落後即在蠻塘上手支下帳房等候時有蠻兵四郎洛布聞信趕至向稱夾壩野番出沒無常此地斷不可紮千萬請回梅玉林以業經到此不願退回隨即住下初更時聽聞犬吠令向興順出帳查看突有三人將伊按倒並有數十人擁進帳棚梅玉林在內施放洋槍立即轟倒一人匪衆稍退旋復四面圍攏擲石亂打梅玉林持槍疊放受傷倒地賊人上前砍戮殞命惟向興順乘閒掙脫躲避天明折轉查點失賊計劫去馱騾十三頭騎馬二匹箱二隻茶包一隻各等語經該員親詣驗明梅玉林頭面均被刀石砍擊血汗模糊右手腕骨斷左手腕亦被砍傷實係受傷

身死協同司鐸畢天祥將屍棺殮當時出具並未知會地方衙門不能相怪洋字結一紙請爲查緝番匪究辦現在該臺員已調土兵並請酌調營兵勦捕等情前來臣等查該司鐸梅玉林來川省巴塘傳教已歷數年地方民教甚屬相安此次押運箱隻馱騎前往鹽井因不知會漢土臺官土司派護徑行前往迨蠻兵得信後速行前往再三勸阻又復執意不肯轉回以致慘遭劫殺其畢天祥洋字結稱並未知會地方官不能相怪是明知梅玉林禍由自取惟三岩野番在該番地劫掠爲事實屬兇頑前駐藏幫辦大臣維慶由川入藏行至大石包該番匪膽敢攔路搶劫殺斃引馬人夫奏奉

奏稿卷二十一

罕

諭旨飭該文武認真緝捕伏查三岩野番本係另種野夷向不歸漢官與土司管轄欽奉前因正設法拏辦聞詎該野番野性不馴又復劫殺洋人雖梅玉林任意獨行自蹈危險然其地究屬附近土司轄境似未便以無人約束稍從寬宥現將該土司等摘去頂戴該員稽志文雖公出未回仍應一併嚴加申飭勒令督率所調土兵六百名剋日深入番巢懸立重賞務將滋事首夥各兇番四面兜拏並設法購捕擒獲追賊給領盡法懲辦又以該野番地險山深並無定處一面飛飭阜和協副將况文榜挑選該營兵丁二百名泰甯營兵丁一百五十名飭派得力都守一員管帶起程以資兜拏並檄委打箭鑪同知李忠清馳往督

同該糧員土司等趕緊查拏追賊懲辦以期迅速而慰遠  
人除俟獲犯後續行奏報並將畢天祥所具並未知會護  
送洋字親筆結一紙咨送總理各國事務衙門查照暨咨  
部外謹將大概情形會同署成都將軍臣托克湍附片具  
陳伏乞

聖鑒訓示謹

奏

奏稿卷二十一

聖

大甯奉節分別添設學額拔額摺

光緒七年十月初二日

奏爲請增大甯縣學額並添設奉節大甯兩縣拔額以育人才恭摺會奏仰祈

聖鑒事竊查夔州府屬之奉節縣原係中學雍正年間分設大甯縣治將奉節縣學取進童生十二名奉節分得八名大甯分得四名原額廩增各二十名以十三名歸奉節以七名歸大甯仍照縣學二年一貢之例兩縣輪流出貢應俟人文充盛之日學政具題再議載入學政全書在案又乾隆十八年議准四川涪州及德陽羅江等八縣自雍正八年分設迄今二十餘年化洽人衆從前分撥取進學額誠屬過隘嗣後涪州學加取三名定爲十名德陽羅江

奏稿卷二十一

呈

二縣各加二名定爲六名又科場條例內載同治八年議准新繁彭縣兩縣及郫縣崇甯榮縣威遠等縣均自分設以來文風蒸蒸日上准其各設拔額一名又同治十二年議准犍樂富榮兩商學准各選拔一名各等因亦在案茲查大甯縣於雍正八年與奉節改爲分治彼時應試人少是以文武學額定爲各四名兩縣輪拔迄今百數十年多士爭自濯磨文風蒸蒸日上應試人數較之奉節不甚懸殊卽與榮縣威遠德陽羅江大致相同徒以限於學額每科僅取四名不免有遺珠之歎又拔貢一途定例必須學校人數多至百餘名始准選拔但大甯縣每科取進僅止四名日增月除難足百名之實數囿於學額太少之故近

年新繁彭縣等處均蒙分定拔額而奉節大甯兩縣同一分設近日士子亦多嚮化情形與新彭等處相同獨不能邀此

曠典情實向隅惟查同治十二年健樂富榮兩商學請增選拔報部商學檔冊每學僅二十餘名今以大甯學冊計之已屬有盈無絀其間敦品勵學堪膺選拔者實不乏人請增文武學額各二名並與奉節一學分設拔額由藩司具詳前來<sub>臣</sub>等覆查該司所詳係爲鼓勵學校起見亦與成案相符合無仰懇

天恩俯准將大甯縣文武學額援照乾隆十八年德陽羅江威遠等縣成案改作中學之半各加二名定爲六名並照同治十二年健樂富榮兩商學增設拔貢之案准與奉節縣各拔一名毋庸兩縣輪拔以彰樂育人才之盛如蒙

俞允卽請自下屆乙酉科爲始由<sub>臣</sub>等會同秉公遴選認真考覈用副

聖主拔取真才至意謹合詞恭摺具陳伏乞

皇太后

皇上聖鑒訓示謹

奏

籌撥鹽釐辦理川北積穀片

光緒七年十一月初五日

再臣以川省生齒日繁人浮於食而民間又鮮蓋藏設遇水旱災荒饑民麇聚求食其情形實爲可慮幸近數年來比歲豐收穀價平減臣查看民力漸紓可以捐辦積穀預防荒歉因飭通省各屬一體妥爲勸諭民情甚爲踴躍現據稟報已經驗收上倉之穀共五十五萬三千二百餘石未收之數尙有五萬餘石亦可陸續收納前經奏明在案惟川省川北保甯潼川順慶綿州各府州山多田少產穀無幾且道路艱險一旦遇有饑荒本境旣無穀可籌購買又難以轉運辦理實虞掣肘萬不可不先事綢繆爲有備無患之計惟預籌莫要於積穀而買穀又無他款可籌臣

奏稿卷二十一

器

再四思維以各該府州籌辦鹽釐本爲接濟軍餉之用而民爲

國本食爲民天鹽釐之能抽收必令百姓於荒歲得免流離斯生聚可恃而後有餘力以煎鹽因得售鹽以納釐此必然之理臣是以飭令各鹽釐局酌量勻撥銀二萬八千九百五十餘兩於綿州三臺中江射洪閬中南部西充蓬溪樂至鹽亭遂甯共十一州縣所屬地方酌度硤瘠貧戶衆寡情形量爲發給採買乾潔穀石存倉以資備禦現據各該州縣稟報已陸續按照市價採辦容俟採買齊全後再行具奏所有臣因川北一路不產穀米積穀爲難酌撥

鹽釐銀兩預爲儲穀備荒緣由謹附片陳奏伏乞

聖鑒訓示謹  
奏

奏稿卷二十一

呈

西藏官兵鹽糧月費請復舊制片

光緒七年十一月初五日

再據藩司鹿傳霖詳竊查西藏官兵應支鹽糧月費向係三年一次撥解銀十三萬兩如有不敷隨時詳請題咨酌撥歷經遵辦在案嗣於同治年間因川省軍務倥傯庫儲支絀撥供臺費之洋藥釐金又所收無幾以致應解藏饗未能年清年款同治十二年駐藏大臣奏准由川補解銀九萬兩以償前欠此後按年解銀六萬兩用濟供支其時川省因積欠藏饗尙未解清是以遵照按年籌撥銀六萬兩計自十三年起至光緒七年止共解過銀四十八萬兩如按三年解銀十三萬核算已較原額銀數多解十萬有奇藏中兵饗月費向有定數前項多解銀兩自必空留藏

奏稿卷二十一

巽

庫無款支銷查近年西藏雜款奏銷冊內有將委辦夷務每案支用兵糧銀一二萬兩並例外一切支款一併造入臺費項下開銷雖由駐藏大臣奏明有案究爲臺費款內向來所無之事截至光緒四年止前後兩藏糧庫尙存臺費銀數萬兩加五六七三年先後撥解銀十八萬兩按照例支核計又應多餘銀四五萬兩併計存項數已不少西藏爲邊防重地固不能不稍留儲備以應緩急但當川省庫項萬分支絀撥款頻仍亦不能不斟酌盈虛量爲挹注况川省應解藏饗本係舊有定額之案當此藏臺無事之際理應遵循舊例撥解藉以撙節請自光緒八年起仍照從前定額三年解銀十三萬兩如果不敷應用或另有需

用之處卽照原案隨時酌撥接濟等情詳請具奏前來臣查川省籌撥藏餼向章按三年解銀十三萬兩如果按年清解本數藏中支用嗣因軍興以後積有舊欠經前駐藏幫辦大臣德泰於同治十一年冬間奏明補解九萬兩以清欠款並將額餼改爲按年解銀六萬兩較原定額數計每年多銀一萬六千餘兩藏中兵餼月費向有定額前項多解銀兩原以邊防重地留備緩急乃近年駐藏文武員弁因有此項存款往往任意私挪迭經駐藏大臣咨川勒追有案是此項多解銀兩川省籌撥旣屬維艱徒供各糧員虧挪肥已自應仍復舊制按三年解銀十三萬兩旣於川庫可稍資周轉於藏餼亦無缺乏之虞且可免虧挪之弊除飭藩司以後照章按年清解不准稍有蒂欠並分咨外是否有當謹附片陳明伏乞

聖鑒訓示謹

奏

靖遠夷匪肅清摺 光緒七年十一月三十日

奏爲官軍進剿靖遠夷匪疊獲勝仗現已一律投誠就撫邊地肅清恭摺馳陳仰祈

聖鑒事竊臣等前將靖遠猓夷竹落等支劫卡戕弁攔搶商民札飭署建昌鎮總兵莫組紳督帶長勝營勇添募鄉導土勇復調派管帶武字副前營記名提督胡國珍等率隊前往隨同相機籌辦並署靖遠營遊擊張錫卿摘頂示懲暨委員往查前署遊擊胡定清有無剋扣情事附片具陳欽奉

諭旨知道了仍當認真查辦以靖邊隅欽此遵卽轉行去後旋據該鎮及甯遠府知府于宗綬稟報竹落各支因此

奏稿卷二十一

哭

次劫卡戕弁攔搶商民自知罪無可逃遂暗地勾結涼山交脚普雄各賊仍復出巢肆行擄掠查閱輿圖竹落一支地面縱橫五六百里內分十大堡曰木落曰哇哇谷曰哈里磨曰勒格木窩以聚其族類又以窩蛇堡鬱兒堡逞噦漠堡三處爲老巢崎嶇深險爲歷來官軍所不能到而與竹落狼狽稱雄者爲阿勒爲哈嚕爲羅洪爲吧切爲謝家爲戈噦爲凹赭均屬獷悍異常又有落摩合咄黑茲合切合呃卜噴暮西阿克各小支隨聲附和而各支內兇悍夷酋則以哈徒格徒鐵呷裸立哈朵和切烏茲石牛阿額五札的加凹咄摸合石都芥都擠虎等爲最且從前大軍圍困髮逆石達開時該夷曾經擄掠髮匪多人入巢教以槍

法自是頻年搶劫多用烏槍狙擊官兵命中較準更非靈便洋槍不能與之相敵並查進兵要路必由緊靠靖遠營之東山寺橫擔山甘相營之洗密窩木廠溝以達於木落哇哇谷等處自非節節進攻難期戡定因批令該鎮府督飭各營將弁穩紮穩打務於出隊時隨探隨進收隊時嚴整槍礮將後作前連環而退並於兩旁高處多派勇丁瞭望一有尾追旁竄之匪前隊均可周知使無所施其伎倆疊據莫組紳于宗綬稟稱該鎮抵任後查夷巢縱橫千餘里路路皆通從前督臣駱秉章曾派武字等共三十餘營進攻均難制勝此次所帶舊部長勝軍只有左右兩營兵力過單遵札招募土著鄉導土勇共二千五百人分爲前

奏稿卷二十一

吳

後左右四營派參將定長遊擊黃耀龍提督唐珊峰總兵喻仁傑分帶並將該府保哨練勇招足成營令提督王聚蘭管帶又調建標中左兩營精兵六百名靖遠營弁兵二百名派署遊擊張錫卿管帶隨營調遣又調越嶺甯越保安制兵五百名派署越嶺營參將蔣宗漢管帶分紮相嶺柏香坪一帶以防東竄又派管帶武安軍參將李錫成率所部勇丁分紮白泥灣等處堵禦以防西逸土司嶺承恩等自備黃斧招集土兵一千六百名隨營接應又領回新造洋槍五百桿配帶鉛藥分授各營作爲前鋒七月十五日各軍戰於橫擔山陣斃夷匪一百三十四名生擒十餘名十六日又戰於東山寺陣斃悍匪二百餘名平燬勒格

木窩等堡堅巢六處奪獲弓箭刀矛鳥槍氈鏡二百餘件  
救出難民趙添禧等男婦四十餘名口我軍陣亡六名受  
傷十四名二十一日戰於哈里磨殲斃夷匪三百餘名踏  
平木落哇哇谷蠻房七百餘間我軍陣亡哨弁一員漢土  
勇丁七名受傷四十五名二十四日管帶長勝右營遊擊  
劉功化管帶鄉導右營唐珊峰管帶定邊後營黃耀龍由  
洗密窩進攻逞噤漠定邊前營管帶武字副前營胡國珍  
鄉導左營喻仁傑由馬廠溝進攻鬱兒堡天色黎明馳抵  
哈里磨山頂胡國珍見左手勒格木窩雖經平燬而附近  
蠻房尚多遂派喻仁傑帶領鄉導縱火焚燒該夷望風遠  
颺並不接仗胡國珍親督副前營徑趨鬱兒堡三面環攻

奏稿卷二十一

五十一

唐珊峰隨與定邊前營分哨前進由哈里磨山溝橫取逞  
噤漠劉功化及幫帶營官參將丁鴻臣各帶劈山礮隊奮  
猛前衝長勝鄉導各勇梟河競渡差弁李金華龍友桂首  
先登坎逆酋瓦札持矛挺拒李金華將其砍斃龍友桂亦  
手刃兇夷數名將七郎磨蠻房燒燬一空劉功化丁鴻臣  
唐珊峰直搗前卡該夷死拒逞噤漠喻仁傑帶隊直攻鬱  
兒堡副前營戰氣愈奮哨弁陳芝祿張又勝等躬冒矢石  
力抵卡門拋擲火蛋噴筒堡中蠻房盡燬羣夷呼號失措  
拔開後堡奔逃喻仁傑督隊跟追胡國珍搜捕餘匪當將  
鬱兒堡燬平而勒格木窩零匪復由老林抄截幫辦武字  
副前營知縣穆秉文署遊擊張錫卿埋伏山坡左右兜出

掩殺該夷奔避不及傷斃無數劉功化丁鴻臣唐珊峰戰至日中亦將逞嘍漠堅巢攻破遂同率大軍直抵窩蛇堡二十六日堡內夷匪肆出各營以五成隊伍接仗五成隊伍紮營斃悍匪四五百名始向老林奔潰各營乘勢追逐並調大礮二十尊轟倒石牆十數丈哨弁席玉德張得勝劉正邦梁壽亭蔡鴻彪各帶奮勇由缺口衝入該匪冒火窮奔翻山越嶺竄過柏香坪又經蔣宗漢督帶防兵攔截追殺二百餘名是役也共斃悍匪九百餘名生擒二十五名搜獲弓箭刀矛氈衣皮甲各數百件牛羊牲畜千餘頭並獲該夷匪所搶客商廣布三百餘包搶哨原贓至此始行搜出覓主發還具領立將窩蛇堡平燬此七月間連日

奏稿卷二十一

至

攻克各堡之實在情形也竹落各堡既平其分支之黑茲滋布佈出吉額租咀嚕咄阿克加吸布約樸租勒烏等支聞風股慄均於閏七月初旬陸續投誠並捆獻不法黑夷擠虎都牛吁茲吸鏝四名白夷十二名小槍柴弓蠻刀竹箭數百件搶擄商民藍白布疋數百包惟兇夷格徒哈徒等仍率醜類抵抗敵閏七月十五日夜胡國珍等督率各軍暗傳口號分三路銜枚前進劉功化帶領長勝右營奮勇數百名由卓谷循山而下什長曾有名首先泗水哨弁成鳳翔陳源濟督隊繼之繞過已焚窩蛇夷巢遙見樹林火星隱現遂合長勝右營定邊前後兩營武字副前營分二千人十面圍攻該匪分兵相拒互有殺傷唐珊峰急

率定邊前營由大溝坎翻過老密坡哨弁曹文盈土司嶺  
承恩土目嶺廷福遙聽礮聲星馳接應曹文盈大呼上前  
砍斃戈噤奮勇逆曾鐵呷餘匪始敗向右手深溝而逃定  
邊後營武字副前營鄉導左營已由曲里暗渡小河越嶺  
包抄截殺砍斃羅洪逆曾摸合的加二人喻仁傑督隊埋  
伏山腰迎頭截擊斃匪七八百名生擒凹赭逆曾烏茲石  
牛二名滾巖落澗者三四百名千總黃明龍正砍殺間突  
遇紅巾悍酋由林內跳出挺矛刺傷黃明龍左肋黃明龍  
忍痛奮躍而前同兵勇將其生擒訊係爲巨逆格徒黃明  
龍旋卽因傷殞命勇目彭三元劉有勝張得魁等七名亦  
皆衝鋒深入受傷陣亡哨弁傅定遠李本立陶發安莫得

奏稿卷二十一

五

成深入險阻格殺謝家著名悍夷石都哈朵牛立拉蛇切  
紅五名割取耳級四十五隻生擒悍夷三十二名我軍帶  
傷者五十八名自格徒成擒後各該夷始望風瓦解其逃  
往相嶺白泥灣等處者均經蔣宗漢李錫成截殺殆盡連  
日又投誠四十餘支二十三四等日定邊兩營鄉導左營  
進攻阿勒羅洪等支力戰於魚黑堡生擒悍夷二十八名  
陣斃三百餘名二十七八等日長勝右營武字副前營進  
攻哈嚕戈噤謝家等支於茹谷谷地方生擒悍匪二十一名  
陣斃四百餘名哨官遊擊胡鎮欽勇丁王占標等十四名  
均中槍箭陣亡於是羣夷相率詣營求撫願將滋事凶悍  
各夷捆獻贖罪莫組紳等准其投誠飭傳木刻互相招集

八九兩月陸續捆獻兇夷哈徒裸立等百餘名呈繳刀矛六百餘件藍白布疋七百餘包皆歷次搶哨真贓並先後救出難民王祥興等九百餘人均經資送回籍九月初五日莫組紳于宗綬親詣靖遠老營飭傳所轄一百三十餘支得力夷酋五百餘名率領大小夷眾二千餘名齊集校場飲血歃盟大鑽牛皮該鎮府宣布

朝廷寬大之恩曉以利害反覆開誠諭導各夷指天誓日不敢再萌叛志造具戶口清冊住牧地址情願出班上班並出具永不滋事甘結各保各段隨卽照例賞以銀牌鹽酒布疋並將擒獲兇夷哈徒格徒和切喀拉凹咄嗎黑阿額別母子等對眾聲數其罪梟首正法各夷畏喜交集羅

奏稿卷二十一

壘

拜而去一面妥議章程飭令各營永遠遵守此又蕩平哈嚕各支一律就撫之實在情形也臣等查靖遠所轄夷地迴環千里山深林密寒暑無節總其名曰涼山其間竹落阿勒哈嚕凹赭大小百餘支迭爲雄長竹落首逆格徒等恃其族大人繁頻年搶擄商民焚燒堡市已屬形同叛逆本年二月間乘新舊交接之際劫卡戕弁意圖大搶蟲會經莫組紳帶兵彈壓始獲保全迨後窺我兵單嘯聚兇夷六七千人直撲我隊是以臣等會商不得不添兵調營力籌勦撫以戢兇頑仰賴

朝廷威福文武和衷將士用命歷時六月之久大小三十餘戰擒斬兇夷計數千名剪除積年滋事兇悍最著之逆

曾五十餘名埽平地五六百里邊境一律肅清洵足彰  
天討而快人心至此在事文武員弁酷暑徂征出深入  
險其間瘴毒交加備嘗艱苦與用兵內地情形不同不無  
微勞足錄茲謹擇其尤爲出力者籲懇

天恩俯准給獎陣亡各員應請

勅部從優議卹以慰忠魂其餘軍功勇目團丁容俟查明  
再行彙案辦理所有進勦靖遠夷匪疊獲勝仗一律投誠  
就撫邊地肅清緣由謹合詞恭摺馳奏伏乞

皇太后

皇上聖鑒訓示謹

奏

奏稿卷二十一

奏



